

**Dr. Siti Hasmah lancarkan Upin & Ipin The Musical
Utusan Online
Februari 28, 2012**

KUALA LUMPUR 27 Feb. - Teater Muzikal Upin & Ipin mencatat sejarah tersendiri apabila tiket pementasan hari pertama dan keduanya pada 14 dan 15 April ini habis dijual, kira-kira dua bulan sebelum pementasan itu berlangsung di Istana Budaya di sini.

Menurut penerbit *Upin & Ipin The Musical*, Burhanuddin Md. Radzi, pihaknya telah mula menerima tempahan tiket bagi menyaksikan persembahan yang diadaptasi daripada siri kartun *Upin & Ipin* yang popular di televisyen (TV) terbitan Les' Copaque Production itu.

"Kami juga akan mengadakan pementasan *Upin & Ipin The Musical* dalam versi bahasa Inggeris pada 28 April ini pukul 3 petang bagi memenuhi permintaan daripada beberapa sekolah antarabangsa sekitar Lembah Klang yang menempah tiket pementasan ini.

"Saya yakin sambutan para penonton akan semakin meningkat memandangkan populariti Upin & Ipin yang turut disiarkan menerusi saluran Disney Channel menggunakan medium bahasa Inggeris.

"Malah, populariti Upin & Ipin juga menular di negara-negara seperti Indonesia, Thailand, Kemboja, Filipina dan Vietnam di mana kami yakin mampu menarik ramai peminat menyaksikan pementasan ini," katanya.

Beliau berkata demikian kepada *Utusan Malaysia* selepas majlis pelancaran teater muzikal itu yang disempurnakan oleh isteri bekas Perdana Menteri, Tun Dr. Siti Hasmah Mohd. Ali di sini hari ini.

Tambah Burhanuddin, *Upin & Ipin The Musical* yang menelan kos hampir RM2 juta itu juga merupakan teater adaptasi dari TV yang pertama dipentaskan di Istana Budaya.

Katanya, jika pementasan muzikal yang berlangsung dari 14 April hingga 6 Mei ini dengan tiket-tiket berharga RM53 hingga mencecah RM300 itu berlangsung dengan jayanya, beliau berhasrat membawa pementasan arahan Zaifri Husin tersebut ke luar negara.

"Kalau *Upin & Ipin The Musical* ini mendapat sambutan ramai, kami bercadang mementaskan ia di negara-negara seperti Singapura atau Indonesia. Ini salah satu usaha kami mengangkat teater muzikal dan animasi tempatan ke peringkat dunia," ujarnya.

Hakcipta Terpelihara © UTUSAN MELAYU (M) BERHAD

Source:

http://www.utusan.com.my/utusan/info.asp?y=2012&dt=0228&pub=Utusan_Malaysia&sec=Dalam_Negeri&pg=dn_20.htm